




Broj: 03-017-5573/2023  
Dana; 06.03.2023. godine



SKUPŠTINA UNSKO-SANSKOG KANTONA

PREDMET: Informacija o stanju nasilja u porodici na području Unsko-sanskog kantona u 2022. godini, dostavlja se

Na osnovu člana 93. i 96. stav (2) Poslovnika Skupštine Unsko-sanskog kantona („Službeni glasnik Unsko-sanskog kantona“, broj: 9/17 i 11/21), u prilogu vam dostavljamo Informaciju o stanju nasilja u porodici na području Unsko-sanskog kantona u 2022. godini, uz sljedeće:

O b r a z l o ž e n j e

Vlada Unsko-sanskog kantona je na svojoj 401. sjednici, održanoj 06.03.2023. godine razmatrala i Zaključkom broj: 03-017-5573/2023, primila na znanje Informaciju o stanju nasilja u porodici na području Unsko-sanskog kantona u 2022. godini, predlagača Ministarstva unutrašnjih poslova.


Shodno odredbama Odluke o metodologiji i rokovima za izradu programa rada i izvještaja o radu koji se upućuju Skupštini i Vladi Unsko-sanskog kantona („Službeni glasnik Unsko-sanskog kantona“, broj: 3/14), pomenuta Informacija dostavlja vam se na razmatranje.

S poštovanjem,

Prilog: Informacija o stanju nasilja u porodici na području Unsko-sanskog kantona u 2022. godini  
(6x)

Dostavljeno:  
1. Naslovu  
2. a/a (2x)

PREMIER KANTONA  
mr.sci. Mustafa Ružnić



Na osnovu člana 16. Zakona o Vladi Unsko-sanskog kantona ("Službeni glasnik Unsko-sanskog kantona", broj: 5/08), na prijedlog Ministarstva unutrašnjih poslova, Vlada Unsko-sanskog kantona na 401. sjednici, održanoj dana 06.03.2023. godine, d o n o s i :

## ZAKLJUČAK

### I

Prima se na znanje Informacija o stanju nasilja u porodici na području Unsko-sanskog kantona u 2022. godini i upućuje se Skupštini Unsko-sanskog kantona na razmatranje.

### II

Ovaj Zaključak stupa na snagu danom donošenja.

Broj: 03-017-5573/2023  
Bihać, 06.03.2023. godine



**BOSNA I HERCEGOVINA  
FEDERACIJA BOSNE I  
HERCEGOVINE  
UNSKO-SANSKI KANTON  
MINISTARSTVO UNUTRAŠNJIH  
POSLOVA**



**BOSNIA AND HERZEGOVINA  
FEDERATION OF BOSNIA AND  
HERZEGOVINA  
THE UNA-SANA CANTON  
MINISTRY OF THE INTERIOR**

**UPRAVA POLICIJE**

**Broj: 05-04/04-1-04-15/23  
Dana: 17.02.2023. godine**

**I N F O R M A C I J A  
O STANJU NASILJA U PORODICI  
NA PODRUČJU UNSKO-SANSKOG KANTONA  
U 2022.GODINI**

**Bihać, februar 2023. godina**

## SADRŽAJ

|  |           |
|--|-----------|
| <b>I UVOD .....</b>                                  | <b>3</b>  |
| <b>A – Opća zapažanja o nasilju u porodici .....</b> | <b>4</b>  |
| <b>II STANJE NASILJA U PORODICI .....</b>            | <b>4</b>  |
| <b>A – Stanje u 2022.godini .....</b>                | <b>4</b>  |
| <b>III OCJENA STANJA .....</b>                       | <b>9</b>  |
| <b>A – Osnovna ocjena .....</b>                      | <b>9</b>  |
| <b>B – Rezime .....</b>                              | <b>10</b> |
| <b>C – Prijedlog mjera .....</b>                     | <b>11</b> |

## I UVOD

Izradom Informacije o stanju nasilja u porodici na području Unsko-sanskog kantona, Uprava policije Ministarstva unutrašnjih poslova nastavlja kontinuitet i praksu stvaranja preduslova da se problematika ove vrste nasilja detaljnije obradi i analizira. Mjesečni i periodični podaci vezani za nasilje u porodici prikazuju se i u izvještajima o radu Uprave policije MUP-a USK.

Nasilje u porodici predstavlja ozbiljnu sigurnosnu pojavu, čije posljedice trpi čitavo društvo i za čije je rješavanje, pored policije koja se uglavnom bavi njegovim posljedicama, potrebno angažirati i druge institucije i stručnjake različitih specijalnosti.

Izloženost žena, kao najčešćih i najbrojnijih žrtava nasilja u porodici, ima duboke korijene u patrijarhalnoj strukturi društva i tradicionalnoj podjeli spolova. Socijalni problemi i promjene u javnom životu poput rata, neimaštine i gubljenja zaposlenja u značajnoj mjeri utiču na odnose među ljudima i pogoduju nasilju, kako u porodici, tako i izvan nje.

Nepobitna je činjenica da većina žrtava (posebno žena) ne prijavljuje nasilje u porodici, jer po svaku cijenu žele sačuvati svoju porodicu i spremne su se žrtvovati za nju, bilo zbog tradicionalnog shvatanja pojma porodice ili zbog straha od neizvjesnosti oko podizanja i odgajanja djece, nedostatka financijskih sredstava i dr.

Nasilje u porodici događa se u cijelom svijetu i prouzrokuje duševne i tjelesne tegobe svih članova porodice, uništava porodicu, pa se ne može i ne smije tolerisati.

U skladu sa donesenim pravilnikom Federalnog ministarstva unutrašnjih poslova, policijski službenici USK-a evidentiraju podatke o krivičnim dijelima nasilja u porodici u Gender bazu, a kako bi svi podaci bili dostupni nadležnim sudovima i tužilaštvu, kao i nadležnim JU Centrima za socijalni rad.

Uprava policije Ministarstva unutrašnjih poslova Unsko-sanskog kantona je i u proteklom periodu, baveći se navedenom problematikom, ostvarila zadovoljavajući nivo saradnje, kako sa centrima za socijalni rad, tako i sa pravosudnim organima, obrazovnim ustanovama, međunarodnim i drugim organizacijama i drugim institucijama, kao i sa „Sigurnom kućom“ u Bihaću.

Posebno je značajan rad tzv. RPZ (Rad policije u zajednici) policajaca, koji su određeni za „rad policije u zajednici“, u koji je uključen i određeni broj žena policijskih službenika, a kojima žene, kao najčešće žrtve nasilja, „lakše“ povjeravaju svoje probleme u slučaju eventualnog nasilja u porodici. Na nivou MUP-a USK-a za „Rad policije u zajednici“ ukupno je zaduženo 46 policijskih službenika, od toga 7 policijskih službenika ženskog pola.

Također, značajan preventivni rad ostvaruje se kroz rad policijskih službenika Sektora kriminalističke policije Odsjeka za maloljetničku delikvenciju, seksualne delikte i nasilje u porodici, koji kroz praćenje stanja problematike „Nasilje u porodici“ usmjeravaju i prate rad svih policijskih službenika koji se bave ovom problematikom. Ostvarena je, također i saradnja sa vladinim i nevladinim sektorom, a policijski službenici se u kontinuitetu educiraju za rad u ovoj oblasti. Činjenica je da se žrtve nasilja sve više i češće odlučuju da prijave nasilje ali su i dalje kod jednog dijela prisutne razne zablude, strah itd., a što se može otkloniti i proaktivnim djelovanjem policije.

Policijski službenici kroz razna edukativna predavanja, samostalno ili u saradnji sa drugima, na seminarima, okruglim stolovima, kroz istupe u medijima i raznim saopćenjima za javnost na nivou općina, nastoje ojačati svijest žrtava da prijave nasilje, jer iste iz straha od nasilnika, osude sredine, ekonomske ovisnosti, zabluda, ne prijavljuju nasilje, čime se ono ponavlja i u nekim slučajevima postaje intezivnije.

Iz tog razloga „Nasilje u porodici“ također spada u sivu brojku kriminaliteta jer se mnoga djela nasilja prikrivaju, prešućuju i mogu se otkriti samo proaktivnim radom policije u zajednici.

Saznanja ukazuju da je ipak svjesnost žrtava u porastu i da se sve češće odlučuju prijaviti nasilje.

## A - Opšte zapažanje o nasilju u porodici

Nasilje u porodici je ponašanje kojim član porodice ugrožava tjelesni integritet, duševno stanje ili spokojstvo drugog člana porodice. Pojavljuje se u raznim oblicima kao fizičko, seksualno, psihičko, emotivno, ekonomsko, duhovno idr. nasilje. Kao žrtve nasilja u porodici najčešće se pojavljuju žene (supruge), a zatim, djeca, muškarci, stara i nejakta lica.

Pod pasivnim zlostavljanjem podrazumijeva se suptilan vid nasilja kao što su dvosmislenost, prebacivanje krivice, zapostavljanje i sl., koje se uglavnom teško uočava kao nasilje, a obično vodi i završi kao fizičko nasilje.

Na ovim područjima i pored toga što se rat završio prije više od 25 godina, u mnogim porodicama postoje ljudi koji su prošli užase rata (logori, razna mučenja, gubljenje članova porodice itd.) što je kod njih prouzrokovalo dugoročne traume, a kod nekih je prisutan i posttraumatski stres.

Siromaštvo, nemogućnost obezbjeđenja sredstava i boljih uslova za život, patrijahalni odgoj, alkoholizam i sl., također može dovesti do nasilja u porodici u nekim, naročito socijalno zapuštenim porodicama.

Pored toga što je, kao relativno novi pojavni oblik kriminaliteta, uveden tek 2003.godine (član 222. KZ FBiH) biće krivičnog djela nasilje u porodici se pojavljuje, prepoznaje i dokumentuje i prilikom obrade drugih grupa krivičnih djela kao što su: KD protiv života i tijela (ubistvo, TTP, LTP) i KD protiv polne slobode i morala (silovanje, rodoskrvuće, bludnje radnje), te KD protiv braka, porodice i mladeži (izbjegavanje izdržavanja, napuštanje djeteta, zapuštanje ili zlostavljanje djeteta i maloljetnika i sl.). Kao žrtve su pojavljuju svi članovi porodice.

U suočavanju sa navedenom vrstom kriminaliteta i dalje je potrebno vršiti edukacije policijskih službenika i adekvatno opremanje prostorija za rad sa žrtvama nasilja, a što je od posebnog značaja kada su kao žrtve nasilja identifikovana djeca. Na području kantona evidentan je nedostatak adekvatnog prostora za sprovođenje zaštitnih mjera koje izriču sudovi i pored Sigurne kuće u Bihaću ne postoji prostor sa istom svrhom na područjima drugih gradova i općina, naročito za smještaj muških žrtava, mada su takve žrtve rijede.

Promatra li se po godinama broj prijavljenih KD „Nasilje u porodici“ u periodu 2013.-2022.g. evidentan je nepravilan trend porasta od 2015.godine.

TABELARNI PRIKAZ KD „NASILJA U PORODICI“  
2013. – 2022.godina

| Godina | 2014.g | 2015.g | 2016.g. | 2017.g | 2018.g | 2019.g | 2020.g | 2021.g | 2022.g |
|--------|--------|--------|---------|--------|--------|--------|--------|--------|--------|
| KD     | 174    | 134    | 141     | 154    | 137    | 173    | 147    | 147    | 157    |
| Ukupno | 1.364  |        |         |        |        |        |        |        |        |

## II STANJE NASILJA U PORODICI

### A – Stanje u 2022.godini

Organizacione jedinice Uprave policije su u 2022.godini evidentirale ukupno prijavljenih 157 krivičnih djela „Nasilje u porodici“, a što je više za 10 ili 6,8% u odnosu na uporedni period 2021.godine i prijavljena 43 prekršaja iz Zakona o zaštiti od nasilja u porodici, što ukazuje na povećanje broja prekršaja za 24 ili 126%. Kada se zbroje broj krivičnih djela i prekršaja po Zakonu o zaštiti nasilja u porodici (200), bilježimo porast ovih događaja za 34 ili 20,4%, u odnosu na 2021.godinu.

**TABELARNI PREGLED UPOREDNIH PODATAKA O UKUPNOM BROJU KRIVIČNIH  
DJELA „NASILJE U PORODICI“ I BROJU PREKRŠAJA  
ZA 2022. I 2021. GODINU**

| GODINA      | BROJ KD | BROJ<br>PREKRŠAJA | SVEGA  |
|-------------|---------|-------------------|--------|
| 2022.godina | 157     | 43                | 200    |
| 2021.godina | 147     | 19                | 166    |
| RAZLIKA + - | +10     | +24               | +34    |
| RAZLIKA %   | +6,8%   | +126%             | +20,4% |

Organizacione jedinice Uprave policije, u periodu 01.01.-31.12.2022.godine, **evidentirale su 157 krivičnih djela nasilja u porodici, što je više za 10 ili 6,8%**, u odnosu na uporedni period.

Ova krivična djela su evidentirana na području Općine Velika Kladuša (46), Grada Cazina (44), Grada Bihaća (34), Grada Bosanska Krupa (13), Općine Sanski Most (8), Općine Ključ (6), Općine Bužim (5) i Općine Bosanski Petrovac (1).

Ukupno je prijavljeno 158 lica, što je više za 6 lica ili 3,94%, u odnosu na uporedni period, od kojih je 50 povratnika, 1 maloljetnik i 107 ostalih počinioca.

Na području Unsko-sanskog kantona evidentirano je ukupno 178 žrtava nasilja u porodici (krivična djela nasilje u porodici), što je identično u odnosu na 2021.godinu. Najčešće žrtve nasilja u porodici su žene, ukupno 123, što je manje za 10, u odnosu na 2021.godinu, zatim muševci 13, što je manje za 9, u odnosu na 2021.godinu i maloljetnici 14 (među kojima se nalaze i djeca), što je manje za 9, u odnosu na 2021.godinu, dok je 28 žrtava nasilja u porodici ostali članovi porodice, kao što su djed, baka, brat, sestra, itd.. Nerijetko su žrtve nasilja u porodici djeca, što se odražava na psihu samog djeteta.

Kada su u pitanju krivična djela i prekršaji, najčešća vrsta nasilja je fizičko nasilje, gdje je evidentirano ukupno 139 slučajeva, što je više za 21 ili 17,7%, zatim psihičko nasilje 19 slučajeva, manje za 1 ili 5%, ekonomsko 2 slučaja, što je manje za 1 slučaj i ostali slučajevi 14, što je manje za 11 ili 44% slučajeva nasilja, a sve u odnosu na 2021.godinu.

Na osnovu broja krivičnih djela i prekršaja vezanih za nasilje u porodici, koja su u nadležnosti policije, organizacione jedinice Uprave policije (policijske stanice) su nadležnim sudovima predložile izricanje 274 zaštitne mjere, a na osnovu tih prijedloga sud je izrekao 179 zaštitnih mjera, što je više za 20 ili 12,5%, u odnosu na uporedni period. Izrečene zaštitne mjere su: zabrana uznemiravanja i uhođenja osobe izložene nasilju- 75, zabrana približavanja žrtvi nasilja- 70, obavezno liječenje od ovisnosti- 8 i udaljenje iz stana kuće ili nekog drugog stambenog objekta- 12.


➤ **KRIVIČNA DJELA**

Na području Unsko-sanskog kantona evidentirano je ukupno 157 krivičnih djela iz člana 222. KZ F BiH (nasilje u porodici), što je više za 10 ili 6,8%, u odnosu na 2021.godinu.

UPOREDNI TABELARNI PREGLED BROJA KD NASILJE U PORODICI PO GRADOVIMA/OPĆINAMA

| OPĆINA /GRAD  | 2022.      | 2021.      | RAZLIKA    |             |
|---------------|------------|------------|------------|-------------|
|               |            |            | + -        | %           |
| BIHAĆ         | 34         | 39         | -5         | -12,8       |
| B.PETROVAC    | 1          | 5          | -4         | -80         |
| CAZIN         | 44         | 39         | +5         | +12,8       |
| S.MOST        | 8          | 20         | -12        | -60         |
| KLJUČ         | 6          | 14         | -8         | -57,1       |
| V.KLADUŠA     | 46         | 22         | +24        | +109        |
| B.KRUPA       | 13         | 6          | +7         | +116        |
| BUŽIM         | 5          | 2          | +3         | +150        |
| <b>UKUPNO</b> | <b>157</b> | <b>147</b> | <b>+10</b> | <b>+6,8</b> |

Prema evidentiranim prijavama, u 2022.godini, ova krivična djela najčešće su se događala na području Općine Velika Kladuša (46), Grada Cazina (44), Grada Bihaća (34), Grada Bosanska Krupa (13), Općine Sanski Most (8), Općine Ključ (6), Općine Bužim (5) i Općine Bosanski Petrovac (1), a što je vidljivo u slijedećem grafičkom prikazu:



Kada uporedimo stanje broja krivičnih djela nasilja u porodici po gradovima i općinama u 2022.godini, u odnosu na uporedni period 2021.godine, može se zaključiti da je **do povećanja** broja krivičnih djela došlo na području Općine Velika Kladuše (46), više za 24, Općine Bosanska Krupa (13), više za 7, zatim Grada Cazina (44), više za 5 i Općine Bužim (5), više za 3.

**Do smanjenja** broja krivičnih djela nasilja u porodici u 2022.godini, u odnosu na 2021.godinu, najviše je došlo na području Općine Sanski Most (8), gdje je isto manje za 12, Općine Ključ (6), manje za 8, Grada Bihaća (34), manje za 5 i Općine Bos. Petrovac (1), manje za 4.

Za krivična djela „Nasilje u porodici“ prijavljeno je 158 lica, više za 63 ili 4%, u odnosu na period 2021.godine, među kojima je 50 povratnika, 1 maloljetnik i 107 ostalih počinioca.

Izvršioi navedenog broja KD „Nasilje u porodici“ su u 110 slučajeva muževi, u 5 slučajeva supruge, u 17 slučajeva djeca i u 26 slučajeva ostala lica.

Broj KD-a „Nasilje u porodici“ u odnosu na 2021.godinu je u porastu za 10 ili 6,8%.

Pored navedenog, nasilje u porodici, kako je već navedeno u ovoj informaciji, analizirana su i krivična djela KZ F BiH iz grupe KD-a protiv života i tijela, grupa KD-a protiv spolne slobode i morala i grupa KD-a protiv braka, porodice i mladeži.

U 2022.godini evidentirano je ukupno 307 (više za 52 ili 20,3%, u odnosu na 2021.godinu) krivičnih djela iz navedenih grupa i to iz grupe krivičnih djela protiv života i tijela evidentirano je 126 krivičnih djela, što je više za 44 ili 53,6%, iz grupe KD protiv spolne slobode i morala evidentirano je 15 KD-a, što je identičan broj u odnosu na 2021.godinu, iz grupe KD protiv braka, porodice i mladeži evidentirano je 166 KD-a, što je više za 8 ili 5%.

Od 126 KD iz grupe KD protiv života i tijela 67 krivičnih djela su vezana za nasilje u porodici i to: „Ubistvo“<sup>1</sup> (2), „Ubistvo u pokušaju“ (1), Teška tjelesna povreda (26) i Laka tjelesna povreda“ (38).

Od 15 KD-a iz grupe KD protiv spolne slobode i morala 5 krivičnih djela je vezano za nasilje u porodici i to: KD „Silovanje“ (2), KD „Bludne radnje“ (2) i KD „Spolni odnošaj sa djetetom“ (1).

Od 166 KD iz grupe KD protiv braka porodice i mladeži, pored 157 KD-a se odnosi na KD „Nasilje u porodici“, evidentirana su i 4 KD „Zapuštanje ili zlostavljanje djeteta“ i 4 KD „Napuštanje djeteta“ (1).

#### TABELARNI PREGLED BROJA OSTALIH KD U KOJIMA SE POJAVLJUJU ELEMENTI NASILJA U PORODICI (2013-2022)

| NAZIV GRUPE KD                      | GODINA |      |      |      |      |      |      |      |      |  |
|-------------------------------------|--------|------|------|------|------|------|------|------|------|--|
|                                     | 2014   | 2015 | 2016 | 2017 | 2018 | 2019 | 2020 | 2021 | 2022 |  |
| KD protiv života i tijela           | 108    | 28   | 4    | 105  | 105  | 86   | 79   | 82   | 126  |  |
| KD protiv spolne slobode i morala   | 6      | 0    | 0    | 16   | 16   | 19   | 15   | 15   | 15   |  |
| KD protiv braka, porodice i mladeži | 190    | 138  | 156  | 162  | 162  | 182  | 161  | 158  | 166  |  |
| UKUPNO                              | 304    | 166  | 160  | 283  | 283  | 287  | 255  | 255  | 307  |  |

*-Dana 11.10.2022. godine u vremenskom intervalu od 09,30 do 10,00 sati, u ulici ZAVNOBIHa br.1H, Grad Bihać, lice O. E. rođen 09.03.1983.godine u Bos. Krupi, stalno nastanjen u Bihaću, upotrebom tupog predmeta-utega težine 1,5 kg zadao više udaraca u predjelu glave svojoj supruzi O. E rođenoj 1990.godine, da bi potom uz pomoć električnog kabla istu lišio života i potom se udaljio u nepoznatom pravcu, iz čega proizilaze osnovi sumnje da je počinio KD „Ubistvo“. Dana 13.10.2022.godine na lokalitetu Grmuša, Grad Bihać, je pronađena NN muška osoba, koja je izvršila samoubistvo vješanjem. Istragom je utvrđeno da se radi o licu O.E, koji je počinio gore navedenog krivičnog djela.*

*-Dana 08.12.2022. godine oko 20,00 sati, u mjestu Vrsta, grad Bihać, u prizemlju porodične kuće lice S.I. rođena 15.08.1986.godine u Bihaću nastanjena u mjestu Vrsta, grad Bihać, je tokom poroda svoje mlđb.kćerke S.M.rođena 29.10.2007.godine u Bihaću, nastanjena u mjestu Vrsta, grad Bihać, uzela živo novorođenče i stavila ga u pvc vreću i istu vezala na čvor, te na osnovu prethodnog dogovora sa mlđ.kćerkom S.M. uzela pvc vreću u kojoj se nalazilo novorođenče i odnijela u kantu sa smeće koja se nalazila u dvorištu kuće i u istu kantu ubacila pvc vreću sa novorođenčetom usljed čega je nastupila smrt kod novorođenčeta. Na osnovu navedenog proizilaze osnovi sumnje da je prvoprijavljena S.I. počinila KD „Ubistvo“ iz člana 166. stav 1. KZ F BiH, a drugoprijavljena malodobna S.M krivično djelo „Ubistvo“ iz člana 166. stav 1. KZ F BiH a u vezi sa članom 31. KZ F BiH „Saučinitelj“. Dana 10.12.2022.godine Kantonalnom tužilaštvu USK Bihać podnešen je izvještaj o počinjenom krivičnom djelu.*

## **PREKRŠAJI U SKLADU SA ZAKONOM O ZAŠTITI OD NASILJA U PORODICI**

| Godina    | 2014.g | 2015.g | 2016.g. | 2017.g | 2018.g | 2019.g | 2020. | 2021 | 2022 |
|-----------|--------|--------|---------|--------|--------|--------|-------|------|------|
| Prekršaji | 11     | 23     | 48      | 51     | 31     | 10     | 8     | 19   | 43   |
| Ukupno    | 244    |        |         |        |        |        |       |      |      |

U toku 2022.godine evidentirana su 43 prekršaja iz Zakona o zaštiti od nasilja u porodici, što je za 24 prekršaja (ili 126%) više, u odnosu na 2021.godinu, za koje su izrečene i adekvatne zaštitne mjere.

Navedeni prekršaji su se dogodili na području Općine Velika Kladuša (38), Općine Sanski Most (4) i Grada Bihaća (1).

Broj počinitelaca navedenog broja prekršaja iz Zakona o zaštiti od nasilja u porodici je 41, dok je broj žrtava 46.

Na području Unsko-sanskog kantona prisutan je problem smještaja žrtava nasilja u porodici, jer postojeća „Sigurna kuća“ u Bihaću ima veoma mali kapacitet.

U skladu sa članom 18.Pravilnika o načinu provođenja zaštitnih mjera, koje su u nadležnosti policije, organizacione jedinice (policijske stanice) su nadležnim sudovima podnijele 274 zahtjeva za izricanje zaštitnih mjera, a na osnovu tih prijedloga sud je izrekao 179 zaštitnih mjera, što je više za 20 ili 12,5%, u odnosu na 2021.godinu.

Još jednom je bitno za istaći potrebu opremanja posebnih prostorija Uprave policije MUP-a USK i njenih organizacionih jedinica, za rad sa žrtvama nasilja u porodici, gdje se nerijetko kao žrtve pojavljuju djeca različite starosne dobi, a čija zaštita je u obavezi svih institucija koje se bave ovom problematikom, u skladu sa Zakonom o postupanju i zaštiti sa djecom i maloljetnicima u krivičnom postupku.

### III OCJENA STANJA

#### A / Osnovna ocjena

Nasilje u porodici je oblik nasilja evidentiran i na Unsko- saskom kantonu i vrši se kroz činjenje krivičnih djela, kao najtežih oblika, preko prekršaja, te incidenata koji su najlakši oblici, odnosno ostalih događaja koji mogu asociirati na nasilje ili njegovu najavu.

Iako je najvažniji oblik djelovanja prevencija, važno je istaći da se policija susreće uglavnom sa posljedicama nasilja, kada je ono poprimilo teže oblike i posljedice.

Saznanja ukazuju da ima još uvijek slučajeva skrivanja nasilja u porodici zbog stida, zablude, neupućenosti, želje da se pokuša sačuvati porodica itd., tako da se nasilje može otkriti samo proaktivnim radom ne samo policije, već i drugih institucija.

Svjesnost o opasnostima od nasilja u porodici je u porastu, čemu doprinose razne edukacije i kampanje, a posebno je važno potpisivanje Protokola postupanja nadležnih institucija u slučajevima nasilja u porodici za gradove i općine USK, gdje su utvrđene konkretne aktivnosti i postupci svih institucija. Ministarstvo unutrašnjih poslova USK primjenjuje Protokol od oktobra 2012.godine.

Prema zapažanjima policije pojavu nasilja u porodici nerijetko uzrokuje teško ekonomsko-socijalno stanje društva, čija osnovna jedinica je porodica, slabljenje funkcije braka i porodice, nezaposlanost, neizvjesna budućnost, alkoholizam i zloupotreba droga, konzervativan odgoj, te shvatanje u nekim sredinama da je fizičko i drugo maltretiranje svoje žene (supruge), pa i djece dozvoljeno i normalno postupanje „glave porodice“ itd..

Na nivou organizacionih jedinica Uprave policije MUP-a USK-a određeni su policijski službenici, koji postupaju po prijavama nasilja u porodici i koji se kontinuirano educiraju i stručno usavršavaju, gdje je shodno tome:

- Dana 04.02.2022.godine, izvršena obuka policijskih službenika na temu „Rad policije u zajednici, prevencija i postupanje u slučajevima nasilja u porodici, rad sa maloljetnicima i žrtvama seksualnog nasilja“. Od strane predavača posebna pažnja je posvećena odredbama KZ F BiH, Zakona o zaštiti od nasilja u porodici, Zakon o zaštiti i postupanju sa djecom i maloljetnicima u krivičnom postupku F BiH i drugim pozitivno pravnim propisima koji se odnose na nasilje u porodici, maloljetničku delikvenciju, oblicima nasilja, vrstama žrtava nasilja i načinu vršenja nasilja posebno nad ženama i djecom kao i posljedicama seksualnog ili bilo koje druge vrste nasilja, važnosti u postupanju svih policijskih službenika kao i saradnji sa drugim organizacijama i institucijama kada je u pitanju prijava djela koja u svom biću imaju obilježje nasilja. Obuci je prisustvovalo ukupno 85 pripadnika policije iz svih 8 policijskih stanica Uprave policije MUP USK.

- Dana 02.03.2022.godine, izvršen obuka policijskih službenika na temu „Rad sa maloljetnicima i žrtvama seksualnog nasilja, trgovine ljudima“. Obuku su izvršili inspektor Odsjeka za edukaciju i samostalni istražitelj iz Sektora kriminalističke policije. Od strane predavača posebna pažnja je posvećena odredbama KZ F BiH, Zakona o zaštiti od nasilja u porodici, Zakona o zaštiti i postupanju sa djecom i maloljetnicima u krivičnom postupku F BiH i drugim pozitivnim pravnim propisima, koji se odnose na maloljetničku delikvenciju, oblicima nasilja, vrstama žrtava nasilja, trgovine ljudima i seksualnog nasilja, međusobne suradnje institucija i razmjene podataka. Obuci su prisustvovala ukupno 92 pripadnika policije iz svih 8 policijskih stanica Uprave policije MUP USK.

- Dana 10 i 11.05.2022.godine od strane Centra za edukaciju sudija i tužilaca Federacije BiH održana dvodnevna obuka na temu “Primjena propisa u oblasti nasilja u porodici“ i koja je održana u skladu sa Programom početne obuke i programom stručnog usavršavanja CEST-a F BiH za 2022.godinu, podržanog od Gender Centra F BiH. Obuci prisustvovalo pet policijskih službenika. Obuka održana u hotelu „Emporium“ u Bihaću.

- Odsjek za edukaciju Ureda komesara zaprimio poziv Gender Centra Vlade F BiH za nominaciju kandidata za učešće na edukaciji na temu „Jačanje institucionalnih mehanizama prevenciju, postupanje i zaštitu u slučajevima nasilja u porodici“. S tim u vezi, pokrenuta je aktivnosti za odabir adekvatnog predstavnika ispred Uprave policije, gdje je nominiran jedan pripadnik Sektora kriminalističke policije, koji je dana 06-07.06.2022.godine uzeo učešće u navedenim aktivnostima, koje su održane na Vlačiću.

- Federalne uprave policije, zajedno sa međunarodnom organizacijom „UN Women“, organizovala obuku na temu „Postupanje policijskih službenika po prijavama nasilja u porodici, provođenja zaštitnih mjera i gonjenja počinitelja krivičnih djela nasilja u porodici i nasilja nad ženama“. Uprava policije je nominirala 18 policijskih službenika koji su uzeli učešća u navedenim aktivnostima, a koje su održane u vremenu od 12.-14.10.2022 godine u Bihaću. Navedena radionica u potpunosti sprovedena uz učešće planiranih 18 policijskih službenika iz svih organizacionih jedinica Uprave policije MUP-a USK.

U poređenju sa 2022.godinom broj krivičnih djela nasilja u porodici (157) je veći za 10, u odnosu na uporedni period (147), a također je povećan i broj prekršaja za 24 ili 126%.

Nasiljem u porodici najviše su ugrožena područja Općine Velika Kladuša gdje je evidentirano 46 krivičnih djela, Grada Cazina, gdje su evidentirana 44 krivična djela, Grada Bihaća, gdje je evidentirana 34 krivična djela, a zatim Grada Bosanska Krupa 13 krivičnih djela, Općine Sanski Most 8 krivičnih djela, Općine Ključ 6 krivičnih djela, Općine Bužim 5 krivičnih djela i Općine Bosanski Petrovac 1 krivično djelo.

Evidentirani prekršaji iz Zakona o zaštiti od nasilja u porodici su se dogodili na području Općina Velika Kladuša 38, Sanski Most 4 i Grada Bihaća 1.

Nasilje u porodici se dešava i kroz izvršenje drugih krivičnih djela, gdje je isto evidentirano i u krivičnim djelima: „Ubistvo“ (2), „Ubistvo u pokušaju“ (1), „Silovanje“ (2), „Spolni odnošaj sa djetetom“ (1), Teška tjelesna povreda (26), Laka tjelesna povreda“ (38), „Zapuštanje ili zlostavljanje djeteta ili maloljetnika“ (4), „Bludne radnje“ (1) i „Napuštanje djeteta“ (1),

U toku 2022.godine dogodila su se dva krivična djela „Ubistvo“ na području Grada Bihaća, koja se dovode u vezu sa nasiljem u porodici.

Neophodno je poboljšati uslove za rad sa žrtvama nasilja u porodici, a nedostaju i prostori za provođenje određenih izrečenih zaštitnih mjera.

U ovoj oblasti ostvarena je dobra saradnja sa vladinim i nevladinim sektorom, a policijski službenici se i dalje educiraju za rad u ovoj oblasti. Žrtve se sve više i češće odlučuju da prijave nasilje, ali su i dalje, kod jednog dijela, prisutne razne zablude i strah, što se može otkloniti proaktivnim djelovanjem svih nadležnih, a ne samo policije.

U cjelini gledano stanje problematike nasilja u porodici na području Unsko-sanskog kantona može se ocijeniti kao zadovoljavajuće.

## **B / REZIME**

Problematika nasilja u porodici je u raznovrsnim oblicima prisutna i na Unsko-sanskom kantonu, a njegova brojnost zahtjeva maksimalnu uvezanost i koordinirano zajedničko djelovanje svih nadležnih institucija, kako Unsko- saskog kantona, tako i cjelokupnog bosansko-hercegovačkog društva.

Posebno je potrebno naglasiti sljedeće:

- Broj KD-a „Nasilje u porodici“ u 2022.godini je u porastu za 10, u odnosu na 2021.godinu.
- Nasilje u porodici je najizraženije na području Općine Velika Kladuša, Gradova Bihać i Cazin, dok je najmanje izraženo na području Općina Bosanski Petrovac i Bužim.
- Pored krivičnih djela iz člana 222.KZ FBiH „Nasilje u porodici“, nasilje u porodici je evidentirano i u grupama krivičnih djela protiv života i tijela, protiv spolne slobode i morala i u grupi krivičnih djela protiv porodice i mladeži.
- U 2022.godini nadležnim sudovima podneseno je 179 zahtjeva za izricanje zaštitnih mjera.
- Krivično djelo nasilje u porodici u najvećem broju slučajeva vrše muškarci- muševci, a najčešće žrtve su žene- supruge.
- Ohrabruje trend porasta svijesti žrtava da nasilje prijave nadležnim institucijama ali je i dalje evidentna nedovoljna educiranost građana u ovoj oblasti.
- Jedan broj slučajeva „nasilja u porodici“ se iz raznih razloga ne prijavljuje policiji, niti Centrima za socijalni rad, te je neophodan njihov dalji proaktivni rad na njihovom otkrivanju.
- Neophodno je poboljšati i uslove za rad sa žrtvama nasilja kroz opremanje adekvatnih prostorija na svim općinama/gradovima na Unsko- saskom kantonu.

### **C – Prijedlog mjera**

- ❖ *Ažurirati raspoložive evidencije, te u kontinuitetu nastaviti provoditi aktivnosti policije na prevenciji nasilja u porodici. Intenzivirati aktivnosti prikupljanja saznanja o nasilju u porodici i kada je niskog intenziteta, te usmjeriti adekvatnu pažnju prema ranije evidentiranim počiniocima i porodicama sa već indiciranim nasiljem.*
- ❖ *Nastaviti jačati suradnju sa centrima za socijalni rad, pravosudnim organima i drugim institucijama, te razmjenjivati podatke i usklađivati zajedničko djelovanje sa istim, u skladu sa potpisanim Protokolom iz 2012.godine.*
- ❖ *Intenzivirati edukacije i stručna usavršavanja, kako policije, tako i socijalnih radnika, zdravstvenih radnika, uposlenika u obrazovanju, u pravosudnim organima i sl., kako bi se postigao viši stepen efikasnosti i koordinacije u njihovom radu. Naročito je poželjno organizirati zajedničke edukacije pripadnika navedenih institucija, koji se bave problematikom nasilja u porodici.*
- ❖ *Podatke o pojavama nasilja u porodici i aktivnostima policije prezentirati kroz provođenje različitih aktivnosti policije u zajednici, vodeći računa o zaštiti integriteta žrtve i onemogućavanju nastavka nasilja.*
- ❖ *Educirati i stručno osposobiti za rad po problematici nasilja u porodici što veći broj žena policijskih službenika.*
- ❖ *Intenzivnije raditi na primjeni Zakona o zaštiti od nasilja u porodici, kao i dosljednoj primjeni Pravilnika o načinu provođenja zaštitnih mjera.*
- ❖ *Nastaviti aktivnosti na poboljšanju uslova i adekvatnom opremanju policije za rad u oblasti nasilja u porodici.*

Obrađivač: Nafka Keserović



Načelnik sektora kriminalističke policije  
Samostalni inspektor policije

Mešić Jusuf

502. Viteške brigade br.2, 77000 Bihać, BiH, Tel: +387/37/224 224, Fax: +387/37/ 221-560  
Web: [www.mupusk.gov.ba](http://www.mupusk.gov.ba), e-mail: [mupusk@mupusk.gov.ba](mailto:mupusk@mupusk.gov.ba) [info@mupusk.gov.ba](mailto:info@mupusk.gov.ba)

Na osnovu člana 93. i 96. stav (2) Poslovnika Skupštine Unsko-sanskog kantona („Službeni glasnik Unsko-sanskog kantona”, broj: 9/17 i 11/21), na prijedlog Vlade Unsko-sanskog kantona, Skupština Unsko-sanskog kantona na ... sjednici održanoj dana \_\_\_\_\_ 2023. godine, d o n o s i :

## ZAKLJUČAK

### I

Prima se na znanje Informacija o stanju nasilja u porodici na području Unsko-sanskog kantona u 2022. godini.

### II

Ovaj Zaključak stupa na snagu danom donošenja.

Broj: \_\_\_\_\_  
Dana: \_\_\_\_\_

Predsjedavajući  
Skupštine Unsko-sanskog kantona